

Siunnersuut uunga: Utoqqalinersiaqarneq pillugu Inatsisartut inatsisaat nr. xx, xx.xx-meersoq.

(Naalakkersuisut sinnerlugit Ilaqtariinnermut, Naligiissitaanermut Isumaginninnermullu Naalakkersuisumit saqqummiunneqartoq)

pillugu

Ilaqtariinnermut Peqqissutsimullu Ataatsimiititaliap isumaliutissiissutaa

Siunnersuut aappassaaniigassanngorlugu saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Tillie Martinussen, Demokraatit, siulittaasoq
Inatsisartunut ilaasortaq Agathe Fontain, Inuit Ataqtigiit, siulittaasup tullia
Inatsisartunut ilaasortaq Jess Svane, Siumut
Inatsisartunut ilaasortaq Laura Tàunâjik, Siumut
Inatsisartunut ilaasortaq Ineqi Kielsen, Siumut
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Mimi Karlsen, Inuit Ataqtigiit

UKA 2015-imi ulloq 8. oktober 2015-imi siullermeerinerup kingorna siunnersuut ataatsimiititaliamit sukumiisumik misissorneqarpoq.

Siunnersuutip imarisaa siunertaalu

Utoqqalinersiallit naammaginnartumik inuunermi atugassaqartinneqarnissaasa qulakkeerneqarnissaa siunnersuutigineqartumi siunertaasoq oqaatigineqarpoq, tassa utoqqalinersiallit aningaasatigut sanngiinnerusumik inissisimasut tigusartagaasa minnerpaaffilerneqarnerisigut inuuniarnerisa oqinnerulersinneqarnissaannik qulakkeerrinnertut paasineqassalluni.

Aammattaaq siunnersuummi siunertarineqarpoq utoqqaat amerliartornerisa kingunerisaanik aningaasartuutit amerliartupiloorneri sillimaffigineqartariaqartut.

Siunnersuummi qulequttat pingaarnertit

Utoqqalinersiaqalernerimi ukioritinneqartut allanngortinneqarnissaat

Siunnersuummi saqqummiunneqarnermisut iluseqartumi utoqqalinersiaqalernissamut ukioritinneqartut maanna 65-iusut 2021-imut 67-inut qaffakkiartuaartinneqassapput.

Qinnuteqarneq naapertorlugu inunnut ukiut 35-t timikkut tarnikkullu nungullarsareersimanerup kingorna utoqqalinersiaqalersitsinissamut kommunalbestyrelsi aalajangiisinnaassuseqarnissaanik periarfissiisoqassaaq.

Utoqqalinersiat aningaasartaasa allanngortinneqarnerat

Utoqqalinersiat tunngaviusumik aningaasartaqarnissaat inuttullu tapeqarnissaat siunnersuutigineqarpoq. Tapit saniatigut meeqqanut tapinik, innarluuteqarnermut aamma peqqiilliuuteqarnermut tapinik aammalu immikkut pisoqartillugu aningaasaqarnermut tapinik tunniussisoqartassaaq. Utoqqalinersiallit aningaasartuutit aalajangersimasut akilereernerisigut aningaasat nammineq atorsinnaasaat minnerpaaffilerneqarnissaannut kommunit aalajangersaasinnaaneri tunngavigalugu aningaasanik nammineq atugassanik aalajangersimasunik tapinik tamatuma saniatigut tunniussisoqarsinnaavoq.

Kalaallit Nunaata iluani ilisisoqassatillugu angalanermi aningaasartuutit matussuserneqartarnissaat

Kalaallit Nunaanni illoqarfigisap avataani qanigisamik toqusoqarsimatillugu ilisinermi peqataanissamut atatillugu ukiumut ataasiarluni angalanermi aningaasartuutit matussuserneqarnissaannut inatsisissatut siunnersuummi utoqqalinersiallit pisinnaatitaaffeqalissapput.

Akeqanngitsumik angerlarsimaffimmi ikiorteqarneq

Utoqqalinersialik angerlarsimaffiminiiginnarnissaa pisariaqartutut isumaqarfigineqarpat akeqanngitsumik angerlarsimaffimmi ikiorteqarnissamik neqerooruteqarnissamut inatsisissatut siunnersuummi kommunalbestyrelsit periarfissinneqassaput.

Suliffeqarnikkut akuuginnarnissamut kajumilersitsiniaaneq

Utoqqalinersiat aningaasartaannut atatillugu utoqqaat inuussutissarsiutinik ingerlatsiinnarnissaminnik kajumissuseqaannarnissaanik siunnersuut imaqarpoq.

Isertitat akileraarutaasussat maanna atuuttut ilanngaatisat ilanngunnagit

Isertitat akileraarutaasussat ilanngaatisat ilanngunnagit aallaavigineqarnissaat siunnersuummi siunniunneqarpoq. Ullumikkut isertitat qinnuteqarfiup nalaani isertinneqartut akileraarutaasussat tunngavigineqassapput isertitat naligiissaarinermi ilanngaaitit appartinnagit, tamatumani ilanngullugu iluanaarfiunngitsumik isertitat taamaaliornikkut qinnuteqartut tamarmik assigiiarnerusumik sullinneqarsinnaalerlutik. Isertitani akileraarutaasussani maanna atuuttuni ilanngaatisat ilanngunnagit naatsorsuinermi ilaassapput isertat A-t aamma isertitat B-t, ilanngaatisat (tassa isertitat akileraarutaasussaniit ilanngaaitit) ilanngaatiginagit. Utoqqalinersiallip taassumalu inooqataa ullumikkut isertitaasa akileraarutaasussat qinnuteqarnerup nalaani nalunaarsorneqassapput, utoqqalinersiallit

inooqataatalu ukioq naatsorsuiffiusumi isertissimasaat aammalu ukiup naatsorsuiffiusup sinnerata ingerlanerani innuttaasup isertitassatut naatsorsuutigisai aallaavigineqassallutik.

Siunnersuummi ilanngulugu oqaatigineqarpoq, utoqqalinersiallit utoqqalinersiaqanngitsunik aappallit aappariit ullumikkut isertitaat akileraarutaasussat ilanngaatisat ilanngunnagit katillugit 200.000 kr.-t ataallugit isertitalit kisimiittutut naatsorsuutigineqassammata.

Inatsisartuni siunnersuutip siullermeerneqarnera

Siunnersuut ulloq 8. oktober 2015-imi siullermeerneqarpoq.

Saqqummiussisuttip Ilaqutariinnermut, Naligiissitaanermut Isumaginninnermullu Naalakkersuisup saqummiussaata saniatigut partiit Siumut, Inuit Ataqatigiit, Demokraatit Atassut aamma Partii Naleqqap oqaaseqartartuisa saqqummiussisutaat allakatigut saqqummiunneqarput. Oqaaseqartartut allaganngorlugit saqqummiussisutaat tamakkiisut Inatsisartut nittartagaanniittut www.inatsisartut.gl innersuussutigineqarput.

Siunnersuut tamakkiisumik **Siumumit** akuerineqarpoq. Aalisartut, piniartut nunalerisullu utoqqalinersiaqalernissaminnut periarfissinneqarnissaat Naalakkersuisut misissussagaat Siumup kissaatigalugu saqqummiuppaa.

Siunnersuummik ataatsimiititaliami suliaqarnermi, pingaartumik inatsisip atuutilerfissaata eqqartorneqarnerani utoqqalinersiaqalernissamut ukiorititat qaffanniarneqarnerini qanoq naleqquttumik piffissaliisoqarnissaa oqallisigeqqinneqassasoq, kisimiittunut utoqqalinersiat qaffanneqarsinaaneri, utoqqalinersiaqalersinnaanermut ukiorititat qaffanneqarnissaannik siunnersuutip ataatsimiititaliami oqaluserineqarnissaanik, aammalu isumaginninnermut inatsimmut assersuutigalugu ineqarnermut tapiissutinut tunngatillugu imaluunniit ajornartorsiutit ataqatigiisut arlallit ataatsimiititaliami oqallisigineqarnissaat **Inuit Ataqatigiit** kaammattuutigaat.

Siunnersuummut tunngaviummik aningaasaqarnikkut nalimmassaanissamillu piunasaqaateqarfiusumut **Demokraatit** aamma akuersaarput. Ungasinnerusumut isigaluni siunnersuusiortoqarnissaa partiip piumanerugaluaraa Demokraatit oqaatigaat, taamaaliornikkut utoqqalinersiaqalersinnaanermut ukiorititat 2024-imi 68-inut 2027-imi 69-inut aammalu 2030-imi 70-inut qaffanneqarssinnaaqqullugit. Illoqarfigisap avataanut ilisiartornermut aningaasartuutit pisortat akuersinissaannut illoqtigiit isertitaat qanoq annertutigisumik sunniuteqasanersut ataatsimiititaliap ataatsimiinnissaanut nalilersorumallugu aammattaq Demokraatit oqaatigaat.

Tusarniaanermi akissuteqaatit

Siunnersuut piffissani ulloq 20. majimiit 24. juni 2015 tikillugu makkununga tusarniaassutigineqarsimasoq ataatsimiititaliap maluginiarpaa:

KANUNUPE, NIISIP, NUSUKA, KANUKOKA, SIK, Sulisitsisut, AK, IMAK, PIP, ASG, PPK, KNAPK, BDO, Inuit Pisinnaatitaaffiinut Kalaallit Nunaata Siunnersuisoqatigiivi, Dansk Institut for Menneskerettigheder (Dansk Inuit Pisinnaatitaaffiinut Institutia), Utoqqaat peqatigiiffiat, Isumaginninnermi Naammagittaalliuuteqartarfik, MIO, IPIS, Inooqat, Namminersorlutik Oqartussani naalackersuisoqarfiit tamarmik kommunillu tamarmik.

Siunnersuummut tusarniaanermut ukua akissuteqaateqarsimasut ataatsimiititaliap maluginiarpaa:

Inooqat, SIK, Sulisitsisut, Institut for Menneskerettigheder (Dansk Inuit Pisinnaatitaaffiinut Institutia), MIO, Isumaginninnermi Naammagittaalliuuteqartarfik, BDO, Inuit Pisinnaatitaaffiinut Kalaallit Nunaata Siunnersuisoqatigiivi, IMAK, NIISIP, ASG, PPK, KANUKOKA, Aalisarnermut, Piniarnermut Nunalerinermullu Naalackersuisoqarfik, Pinngortitamut, Avatangiisinut Inatsisinillu Atuutsitsinermut Naalackersuisoqarfik, Qaasuitsup Kommunia, Kommuneqarfik Sermersooq, Qeqqata Kommunia.

Siunnersuummut tusarniaanermut ukua oqaaseqaateqarsimanngitsut ataatsimiititaliap maluginiarpaa:

Pinngortitamut, Avatangiisinut Inatsisinillu Atuutsitsinermut Naalackersuisoqarfik, Institut for Menneskerettigheder (Dansk Inuit Pisinnaatitaaffiinut Institutia), Aalisarnermut, Piniarnermut Nunalerinermullu Naalackersuisoqarfik, Kattuffik Utoqqaat Nipaat.

Siunnersuutip nalinginnaasumik opqaaseqaataanni tusarniaanermi akissuteqqatip imarisaa pingaarnerpaaq Ilaqutariinnermut, Naligiissitaanermut Isumaginninnermullu Naalackersuisoqarfimmut tunniuneqartoq misissorneqarsimasoq ataatsimiititaliap maluginiarpaa.

Tusarniaanermi akissutigineqartut tamaasa misissornissaannut ataatsimiititaliaq periarfissaqarsimavoq, tusarniaanerlu naammassineqartoq ataatsimut tusaatissatut tigullu. Nuna Tamakkerlugu Kattuffik Utoqqaat Nipaat tusarniaanermi akissuteqarsimanngitsoq siunnersuutip siullermeerneqarnerani maluginiarneqarpoq, taamaattumik ataatsimiititaliap siunnersuummik suliaqarnermini Kattuffik taanna ataatsimeeqatigerusussimavaa.

Siunnersuummik ataatsimniititaliap suliarinninnera

Nuna Tamakkerlugu Kattuffik Utoqqaat Nipaat-nik ataatsimeeqateqarneq

Nuna Tamakkerlugu Kattuffik Utoqqaat Nipaat sinniisai ulloq 14. Oktober 2015-imi ataatsimeeqatigineqarnissaanut ataatsimiititaliaq qaaqqusivoq. Kattuffik Utoqqaat Nipaat

nuna tamakkerlugu Kattuffiusoq ataatsimiititaliamit uppersarsineqarpoq taamaalillunilu utoqqaat peqatigiiffiit ataasiakkaanut ataatsimut oqaaseqartartuulluni. Utoqqaat Kattuffiata illoqarfinnilu utoqqaat peqatigiiffiisa akornanni ingerlaavartumik oqaloqartigiittoqartartoq ataatsimiititaliamut paasissutissiissutigineqarpoq naak nukissatigut killeqatoqaraluartoq. Taamaattoq avannaani tunumilu utoqqaat peqatigiiffii utoqqaallu ataasiakaat tamakkerlugit Kattuffik Utoqqaat Nipaata oqaloqatigisimangilai.

Iluarsartuussinermi suliniutit taamaattut utoqqarnullu tunngasuni iluarsartuusinissamut siunnersuutit siusissukkut oqaloqatigiinnernik ingerlatereernerup kingorna piffissaalluartillugu pilersarusiorneqartarnissaat kattuffiup pingaartittorujussuullugu oqaatigaa. Taamatutaaq iluarsartuussinernup imarisaa pillugu peqqissaartumik paasissutissiissutigineqarnissaa pingaaruteqartorujussuuvoq, utoqqalinersiaqartut utoqqalilersullu pissutsinut piffissaalluartillugu naleqqussarsinnaaqqullugit.

Nuna Tamakkerlugu Kattuffimmit utoqqaat peqatigiiffii tamakkerlugit oqaloqatigineqarsimanginnerat eqqarsaatigalugu siunnersuutigineqartumi ataasiakkaat pillugit ataatsimoorussamik Kattuffik oqaaseqarsinnaangilaq. Siunnersuut namminermi qularutissaangitsumik utoqqarnut amerlasuunut pitsaasunik imaqarpoq soorlu akeqanngitsumik angerlarsimaffimmi ikiorteqartalernissaq.

Utoqqalinersiaqalernissamut ukiorititat qaffanneqarnissaat Kattuffimmit ataatsimut isigalugu ernumassutigineqarpoq. Utoqqaat assigiiaartuunnginnerat nunatsinnilu inuuniarenermi atukkat assigiinngitsorujussuunerat Kattuffimmiit oqaatigineqarpoq. Utoqqarpasuit sulerulussimanerup kingunerisaanik nungullarsimapput suliffissaqarniarnemilu periarfissat nikerarlutik. Inuit ilaannut suliffeqaannarsinnaaneq pitsaasuuvoq, eqqumaffigineqartariaqarportaaq amerlasuut tamanna attassinnaangimmassuk. Ataatsimut isigalugu utoqqalinersiaqalernissamut ukiorititat qaffanneqarnissaat minnerpaamik ukiumik ataatsimik kinguartinneqartariaqaraluartoq Kattuffik isumaqarpoq.

Kattuffiit AK-p, ASG-p, IMAK-p, NPK-p aamma PKK-p ataatsimut saaffiginnissutaat

Kattuffinnit taaneqartunit ataatsimut saaffiginnissummik ataatsimiititaliaq tigusaqarpoq, matumani ernumassutigineqarluni ineqarnermut tapiissutit, siusinaartumik pensionisiat utoqqalinersiallu pillugit siunnersuutit ataqatigiissaarneqarsimagunanginneri, pensionit pillugit aaqqissuussinerit Kalaallit Nunaani atuutinngitsunik pensionisianik akileraarusiiniarneq Naalakkersuisunit siuartinneqarnissaa kissaatigineqarmat. Inuiaqatigiinni sulisussarsiornikkut ajornartorsiutinik kinguneqarsinnaammata, aningaasatigut ajorseriaat taanna inunnut Kalaallit Nunaanni suliarorusuttunut qunulersitsisinnanera saniatigut ataatsimut suliniutigineqartut pensionisialinnut arlalippassuarnut ajorseriarnermik kinguneqarsinnaasoq kattuffinnit oqaatigineqarpoq.

Utoqqalinersiat pillugit siunnersuummut tunngatillugu tjenestemandit pillugit malittarisassanut siunnersuutip ataqatigiissinniarneqarnera annertoq ajornartorsiutitaqarnera immikkut erseqqissaatigineqarpoq, tassami tjenestemandit qaammatip 65-iliiffiup naanerani pinngitsaalineqarlutik soraarninngortinneqartarmata. Tjenestemandit soraarninngortut taakku soraarninngornermi ukiorititat 66-iniit kingusinersukkut 67-inut qaffanneqarnissaat pilersaarutaammat utoqqalinersiat pillugit malittarisassanut ilaatinneqanngillat, taamaattumik inatsisip naleqqussarneqarnissaa pisariaqarpoq.

Apeqqut

Siunnersuummik suliaqarnermini atugassaminik apeqqutit arlaqartut akineqarnissaat pillugu Ilaqtariinnermut, Naligiissitaanermut Isumaginninnermullu Naalackersuisoq ataatsimiititaliamit qinnuigineqarpoq. Ataatsimiititaliap apeqqutaasa Naalackersuisunullu ilaasortap akissuteqaataata assilineri isumaliutissiisummut matumunnga **ilanngussaq 1-tut** ilanngunneqarput.

Ataatsimiititaliap inatsisissatut siunnersuummik misissuina

Ataatsimiititaliap siunnersuummik misissuinaermini suliarinninnerminilu siunnersuummi iluarsisut ulloq 1. oktober 2015-imi agguanneqartoq aallaavigineqartoq aallarniutigalugu maluginiarneqarpoq.

Utoqqalinersiat pillugit siunnersuut kapitalinut 14-inut paragrafinullu 31-inut immikkoortitigaavoq.

Kapitali 1 *Piumasaqaatit nalinginnaasut.*

Utoqqalinersianut malittarisassat atuuttut naapertorlugit 65-iliisimagaanni utoqqalinersiaqartoqalernissaavoq.

Siunnersuummi matumani siunnertarineqarpoq utoqqalinersiaqalernerme ukioritinneqartut ulloq 1. januar 2017-imi 66-inut qaffanneqassasut. Taamaattorli matumani siunnersuutigineqarpoq suliamut atatillugu qinnuteqartoqartillugu inummut minnerpaamik ukiuni 35-imi timikkut tarnikulluunniit nungullarsarsimanagerup kingunerisaanik ulloq 1. januar 2021-imi aatsaat 66-inut qaffaanissamut kommunalbestyrelsi aalajangiisinaassasoq.

Aammattaaq siunnersuutigineqarpoq utoqqalinersiaqalernerme ukiorititat ulloq 1. januar 2021-imi 67-inut qaffanneqassasut. Taamaattorli matumani siunnersuutigineqarpoq suliamut atatillugu qinnuteqartoqartillugu inummut minnerpaamik ukiuni 35-imi timikkut tarnikulluunniit nungullarsarsimanagerup kingunerisaanik ulloq 1. januar 2025-imi aatsaat 67-inut qaffaanissamut kommunalbestyrelsi aalajangiisinaassasoq.

Utoqqalinersiutit utoqqarnillu paaqqinniffiit pillugit Inatsisartut peqqussutaat nr. 7, 1982-28/10-mi utoqqalinersiaqalernissamut ukiorititat 60-upput.

Kalaallit Nunaanni utoqqalinersiaqalernissamut ukiorititat kingullermik qaffanneqarput utoqqalinersiat pillugit Inatsisartut peqqussutaat nr. 3, 7. maj 2007-imi, tamatuma kingunerisaanik utoqqalinersiaqalersinnaaneq 63-iniit 65-inut qaffanneqarluni. Tamanna pivoq ulloq 1. Januar 2008-mi atuutilersumik, taamaattoq 1. januar 2010-mut ikaarsaarnissamut aaqqiisoqarluni.

Inuit Kalaallit Nunaanni inuusimasut agguaqatigiissitsinerit tamaasa ilanngullugit inuuneqortussusaat 2013-imi angutinut 67.3-uvoq arnanullu 73.3-ulluni.

Utoqqalinersiat saniatigut inunnut timimikkut tarnimikkulluunniit pissuteqartumik ataavartumik sulisinnaanerisa annikillisimasunut siusinaartumik pensionisiaqalersitsisoqartarsimasoq ataatsimiititaliap maluginiarpa. Tamanna taamaalilluni inunnut, utoqqalinersiaqalernerup saniatigut pisortanit soraarnerussutisiaqalernissamut periarfissaqartut, timimikkut tarnimikkullu pissuteqartumik sulisinnaanerisa ataavartumik annikillisimatillugit.

Siunnersuummi matumani utoqqalinersiaqalernissamut ukiorititap allanngortinneqarnissaanut eqqarsaatigineqartup qanoq naleqquttumik ilimasaaruteqarnissaq pillugu apeqqut ataatsimiititaliap naliliivigaa. Oqaatigineqareersutut utoqqalinersiaqalernissamut ukioritinneqartoq ulloq 1. januar 2017-imiit 66-inut aammalu ulloq 1. januar 2021-imiit 67-inut qaffanneqarnissaa ataatsimut isigalugu siunertarineqarpoq.

Innuttaasut isaannit isigalugu piffissaalluartillugu piareersarnissamut periarfissaqarnissaqarnissaq pingaaruteqartoq ataatsimitimiititaliamit oqaatigineqassaaq. Ataatsimiititaliami amerlanerussuteqartut Siumut aamma Demokraatit pissutsit naapertorlugit ilimasaaruteqarnissaq pillugu siunnersuutigineqartoq akuerisinnaavaat. Siunnersuutigineqartumi innuttaasut annertuumik nungullarsimasut isiginiarneqartut amerlanerussuteqartunit maluginiarneqarpoq.

Aammattaaq utoqqalinersiaqalernissamut ukiorititap qaffanneqarnissaannut siunnersuut ataatsimiititaliamit oqaluuserineqarpoq, matumani ilanngullugu siullermeerineri Demokraatit siunnersuutigisaat, tassa 2024-imi 68-inut 2027-imilu 69-inut kiisalu 2030-imi 70-inut qaffanneqarnissaannik siunnersuutaat. Ataatsimut inuunertusiartorneq aningaasartuutitigullu unammilligassanut kingunerisassat naammassineqarsinnaaneri siunertaralugu.

Utoqqalinersiaqalernissamut ukiorititap qaffanneqarnissaa pillugu siunnersuutigineqartoq aammalu siunnersuut pillugu piffissaalluartillugu ilanngullugu aalajangiinissaaq taamatuttaaq utoqqalinersiaqalernissamut ukiorititap qaffaqqinneqarnissaanik ilimasaarineq pillugit oqallinnerit pillugit ataatsimiititaliaq ima inerniliivoq, siunnersuut ilusimisut iluseqartoq, ikaarsaarnissamut aaqqissuussinermik siunnersuutigineqartoq ilanngullugu ataatsimiititaliami amerlanerussuteqartut Siumut Demokraatillu akuersissutigisinnaavaat ataatsimiititaliamili ikinnerussuteqartut Inuit Ataatigiit kaammattuutigaat siunnersuutitut taamatut isikkulinnut sivilunerusumik piffissaqartitsilluni ilimasaarutigineqartassasut.

Ungasinnerusoq isigalugu isiginneriaaseq eqqarsaatigalugu pensionisiaqartunut ukiorititat qaffanneqarnissaannut piffissap ilimasaarutigineqarnerata sivikippallaarnera pillugu isornartorsiuineq sillimaffiginarlugu, utoqqalinersiat 2024-imi 68-inut aamma 2017-imi 69-inut kiisalu 2030-imi 70-inut qaffanneqarnissaat siumut isigisumik Demokraatit siunnersuutigaat. Aammattaaq matumani Kalaallit Nunaanni sivilunerusumik inuuneqaleriartorerup pingaartinneqarnissaa siunertarineqarpoq siumullu isigisumik Kalaallit Nunaata atugarissaarnikkut aaqqissugaanera aningaasatigut toqqammavissinneqarnissaa qulakkeerumallugu.

Pingajussaaneerinissamut Naalakkersuisut kissaatigineqartut naapertorlugit allannguutissatut siunnersuuteqarnissaat Demokraatinit kaammattuutigineqassaaq, tamanna Naalakkersuisunit tamanna kissaatigineqanngippat pingajussaaneerinissamut akissuteqaammut tunngavilersoqquneqarpoq.

Utoqqalinersiaqalernissamut tunngatillugu siunnersuummi allannguuteqartitsinissaaq politikikkut siunnersuutigineqassappat utoqqalinersiaqalernissamullu ukiorititap qaffanneqarnissaanik siunnersuut malunnaatilimmik aningaasatigut kingunerisassai pillugit ilassutitut ataatsimiititaliamit oqaatigineqassapput.

Utoqqalinersiaqalernissamut nalinginnaasumik piumasaqaatinut tunngatillugu danskisut innuttaassuseqartariaqarneq, qinnuteqarnerup nalaani minnerpaamik ukiuni pingasuni Kalaallit Nunaanni aalajangersimasumik najugaqarsimanissaaq pillugu malittarisassat pingaarnerit ilaatigut siunnersuummi pingaarnermi § 2, imm. 2, naqinnerni 2 saneqqussisinnaaneq malinneqarpoq.

Tamatumani assersuutigalugu kinamiusut, filippinerisut thailandimiusullu innuttaassusillit Kalaallit Nunaanni utoqqalinersiaqalersinnaanerannik periarfissiivoq, naak assersuutigalugu malittarisassat atuuttut naapertorlugit Inatsisartunut qinersinermi qinersisinnaanngikkaluartut, tamakkiisumik akileraartussaataagaaluarlutik. Tamatumunnga atatillugu siunnersuummi § 7 ataatsimiititaliamit innersuussutigineqassaaq, Kalaallit Nunaanni ukiunik qassinik

aalajangersimasumik najugaqarsimaneq aallaavigalugu piffissaq katersiviusoq naapertorlugu iluarsivigineqartassalluni.

Siunnersuummi § 2 pillugu ataatsimut ataatsimiititaliamit oqaatigineqassaaq baalajangersagaq naammaginatsumik oqimaaqatigiissuseqartoq.

Siunnersuummi § 5 imm, 2 erseqqissarneqassaaq, siunnersuummimi matumani nutaaliarluni aalajangersakkani aalajangersarneqarmat utoqqalinersialik kisimiittutut isigineqartartoq, naak utoqqalinersialik inooqateqaraluartoq utoqqalinersiaqanngitsumik, utoqqalinersialik taasumalu inooqataa ukiumut katillugit isertitat akileraarutaasussat maanna atuuttut ilanngaattissat ilanngunnagit 200.000 kr.-t ataallugit isertitaqartut. Taamatuttaaq utoqqalinersiallip inooqataa isumaginninnikkut ulloq unnuarlu angerlarsimaffimmut ataavartumik najugaqalersimagaluartoq siunnersuummi § 5, imm. 3 malinneqarpoq. Matumani utoqqalinersialik kisimiittutut aamma isumaqarfigineqartarpoq.

Kapitali 2 Utoqqalinersiaqarsinnaanngorneq katersisarnerlu

§§ 6-7-imut siunnersuutitut ataatsimiititaliaq immikkut oqaaseqaatissaqanngilaq, aalajangersakkat taakku pisarialimmik ersarimmata.

Kapitali 3 Utoqqalinersiat aningaasartaat aamma Kapitali 4 Utoqqalinersianik ukiumoortumik nalimmassaasarneq

Siunnersuummi § 8 naapertorlugu utoqqalinersiat siunissami tunngaviumik aningaasarsianit inuttullu tapinik imaqaassapput.

Siunnersuummi §§ 9 aamma 11 pingaaruteqarput, aningaasat taakku isertitat maanna atuuttut ilanngaattissat ilanngunnagit akileraarutaasussat ataatsimut annertussusaasa malitsigisaanik qanoq taakku annikillineqarsinnaaneritut aalajangersakkat maleruagassiornissaasa saniatigut isumaginninnikkut qulakkeerinissaq pillugu Nunat Avannarliit Isumaqaatigiissutaat naapertorlugu utoqqalinersiat pensionisiallu eqqaassanngikkaanni, qanoq annertutigissanersut tunngaviumillu aningaasartai utoqqalinersiallu aningaasartai allassimmata.

Kommunini sullissit atugassaannik ilitersuummik Naalakkersuisut suliaqarnissat pingaaruteqartorujussuuvoq, utoqqalinersiat eqqortumik naatsorsorneqartarnissat qulakkeerumallugu.

Siunnersuummik siullermeerinninnerup nanginneratut utoqqalinersiallit kisimiittut atugaat immikkut ataatsimiititaliami oqaluserineqarput, oqallinnermi saqqummiunneqarmat kisimiittut immikkut malunnaatilimmik siunnersuummi pingaartillugit isiginiarneqanngimmata.

Ilannugsaq 1 naapertorlugu utoqqalinersiallit kisimiittunut 300 kr.-inik, 500 kr.-inik imaluunniit 1000 kr.-inik qaffaanerup aningaasatigut kingunerisassai pillugit ataatsimiititaliaq apeqquteqarpoq. Taamatut qaffaanerup 7 mio. kr.-inik, 12 mio. kr.-inik aamma 24 mio.kr.-inik ukiumut aningaasartuuteqarnerulernermik malitseqassasoq akissuteqaammi allassimavoq.

Siunnersuummik matuminnga sukumiisumik oqaluuserinnereernerup kingorna ataatsimiititaliami amerlanerussuteqartut Siumut Demokratit aningaasaqarnikkut taama inissisimasoqartillugu taama qaffaasoqarnissaanut piffissaangitsoq oqaatigineqassaaq, taamaattorli siunnersuutip allannguutissatullu siunnersuutip malitsigisaanik qaffaasoqarsinnaasoq.

Siunnersuummi kapitali 4-mut ataatsimiititaliaq ilassutitut oqaaseqaatissaqanngilaq, siunnersuummi aalajangersagaq § 12 pisarialimmik ersarissumik allassimammat. Siunnersuummi § 20, imm. 1 ataatsimiititaliamit innersuussutigineqassaaq, matumani inuttut atukkat utoqqalinersiat taakkulu annertussusaannut sunniuteqarsinnaasumik allannguisinnaasut pillugit oqartussanut utoqqalinersianik pisartagalik nalunaaruteqarnissamik pisussaaffeqarmat. Nalinginnaasumik utoqqalinersiallip isertitatigut atugaasa allannguuteqarnerannik maanna atuuttumut tunngassuteqarsinnaavoq, assersuutigaluguli aamma inooqatigiinnermi aappariinnermilu pissutsinut tunngassuteqarsinnaalluni.

Kapitali 5 Paaqqinnittarfinni il.il. angerlarsimaffiup avataani inissisimaneq.

Angerlarsimaffinni assigisaaniluunniit aningaasartuutit pisortat akilersugaanni najugaqarnermi utoqqalinersialik utaqqiisaasumik sivisunerusumilluunniit nammineq angerlarsimaffigisami avataani najugaqarallarnernanut siunnersuut § 13 tunngassuteqarpoq maleruagassiorneqarlunilu.

Siunnersuummi § 13, imm. 1 pillugu ataatsimiititaliaq immikkut oqaaseqaatissaqanngilaq, naak utaqqiisaasumik sivisunerusumilluunniit angerlarsimaffigisap avataani najugaqarnissaq qaqugukkut piffissanngortarnerisooq sukumiinerusumik siunnersuummi nassuiaatigineqarnera ersarlukkaluartoq. Erseqqissaanissaq kingornalu ilitsersuummik erseqqissaanissaq siunertaralugu Naalakkersuisut oqaaseqaateqarnissaat naatsorsuutigineqarpoq.

Angerlarsimaffiup avataani utaqqiisaasumik sivisunerusumiluunniit najugaqarneq pillugu apeqqutip naliliivigineqarnissaanik oqartussaqaarfiup akiliussisussap ingerlaavartumik pisussaaffeqarnera pillugu qulakkeerseqassasoq apeqqutillu tamatuma Naalakkersuisut najoqqutassiaannik aallaaveqassasoq ataatsimiititaliamit kaammattuutigineqassaaq.

Siunnersuummi § 13, imm. 2 immikkut ataatsimiititaliami eqqartorneqarpoq, utoqqalinersiat sivisunerusumik imaluunniit ataavartumik angerlarsimaffiup avatannut angerlarsimaffinnut assigisaanilu najugaqarnermi aningaasartuutit pisortanit akilerneqartartut, siunnersuummilu

maleruagassat aalajangiisuunerat qaammammi nuuffiusumi qaammammusiat qaammatillu tullia allannguuteqartinneqaratik, tamatumali kingorna tunngaviusumik aningaasat 46 procentii taamaallaat tunniunneqartarnerat, tamatuma saniatigut qaammatip nuuffigisap kingorna inuttut tapinik tunniussaqaarsinnaaneq qaammatip tulliani unitsinneqartarluni.

Taama aqqineq oqimaaqatigiissorinartoq ataatsimiititaliamit oqaatigineqassaaq.

Kapitali 6 *Tapit meeqqanut tapit, Innarluuteqarnermut aamma*

peqqiilliuuteqarnermuttapeq aamma Aningaasaqarnermut tapeq aamma saniatigut tapeq

Siunnersuummi §§-ini 14 aamma 15-imi meeqqanut tapit pineqarput. Siunnersuummi §§-ini 14-aamma 15-i paasinarlunilu ersarissumik allasimasoqartoq ataatsimiititaliaq isumaqarpoq, aalajagersakkanullu taakkununga taamaalilluni annertunerusumik oqaaseqaatissaqarani.

Siunnersuummi § 16-imi innarluuteqarnermut aamma peqqiilliuuteqarnermut tapit pineqarput. Siunnersuummi § 16 pisariaqartinneqartutut ersarissuseqartoq ataatsimiititaliaq aamma isumaqarpoq. Taamaattoq utoqqalinersiat pillugit malittarisassanut ilaatinneqareernermikkut utoqqalinersialinnut malittarisassat annertuumik innarluutillit pillugit maleruagassanut sanilliullutik ajornerusumik inissisimannginnissaat ataatsimiititaliamit tikkuarneqassaaq. Pineqartumi malittarisassat sukumiisumik Naalackersuisunit piaartumik suliarineqarnissaat ataatsimiititaliamit qinnutigineqassaaq.

Siunnersuummi § 17, imm. 1 aamma 3-mi aningaasaqarnermut tapit pineqarput, immikkorluinnaq aningaasaqarniarnikkut ajornartorsiuteqartoqartillugu imaluunniit aningaasaqarnikkut ajornartorsiorluinnartoqartillugu qaqinneqarsinnaasoq.

Aningaasaqarnermut tapit pillugit aalajangersagaq erseqqinnerusumik qanoq annertussuseqarnerasoq aammalu tassunga ilanngullugu qaqugukkut pissutsillu qanoq ittut atuutsillugit aningaasaqarnikkut immikkut ittumik ajornartorsiuteqartoqarnerasoq aningaasaqarnikkulluunniit annertuumik ajornartorsiuteqartoqarnerasoq pillugu aalajangersakkamut nassuiaatini saqqummiunneqartut ataatsimiititaliamit oqaluuserineqarput. Aalajangersakkat pisariaqartinneqartumik ersarissumik kommuninit aqunneqarsinnaaniassammat Naalackersuisut nalunaarusiamik ilitsersuummillu suliaqassasut ataatsimiititaliap erseqqissaatigalugu oqaatigissavaa.

Siunnersuummi § 17, imm. 4-mi aningaasanut nammineq atorsinnaasanut tapeq pineqarpoq. Aningaasanut nammineq atorsinnaasanut tapeq pillugu siunnersuut 1. oktober 2015-imi siunnersuummut naqqiissuteqarnermi saqqummiunneqarpoq taamaalillunilu siunnersuummut tusarniutigineqartumut ilaanani. Tusarniaanermi akissutigineqartut taakku pingaartumik kommunit ujartorneqalermata, tusarniaanermi akissutinik sukumiinerusumik misissuereerlutik tapiissutip taassuma politikkikkut siunnersuummut ilanngunneqarnissaa Naalackersuisut kajumissuseqarfigilersimavaat.

Matuma kingorna akiligassat aalajangersimasut akilereerlugit utoqqalinersiallit aningaasat nammineq atorsinnaasaasa minnerpaaffissaat aalajangersaavigisalernissaat kommunit siunnersuutigineqarpoq.

Siunnersuummi § 17, imm. 4-mut tunngatillugu aningaasanut nammineq atugassatut tapinut tunngatillugu utoqqalinersialinnut aningaasanut nammineq atugassanut kommunit minnerpaaffiliillutik aalajangersaaniarnerat politikikkut naammagimaarneqarmat ataatsimiititaliamit oqaatigineqassaaq.

Siunnersuummi § 17, imm. 6-imi Kalaallit Nunaanni illoqarfigisami avataani ukiumut ataasiarluni ilisinermut peqataajartornissamut utoqqalinersialik pisinnaatitaaffilerneqarpoq. Upernaakkut ataatsimiinnermi 2015-imi UPA 2015/20-imi siunnersuummut akuerineqartumut utoqqalinersiallit ukiumut ataasiarlutik illoqarfigisami avataanut ilisiartornissamut ikiorserneqartarnissaat siunnersuummi matumani maleruagassiuunneqarput. Siunnersuut ilusimisut iluseqartoq ima oqaasertaqarpoq:

Utoqqalinersiallit qanigisaminnik toqusoqartillugu ukiumut ataasiarlutik nunatsinni illoqarfigisap avataani ilisinermut peqataanissamut qinnuteqarnermi ikiorserneqarnissamut periarfissinneqarnissaannut tunngavissamik utoqqalinersiat pillugit malittarisassani ilanngussisoqarnissaanik siunnersuutissamik suliaqaqqullugit Naalakkersuisut peqquneqarnissaat pillugu Inatsisartut aalajangiiffigisassaattut siunnersuut. Utoqqalinersiallip aningaasaqarnikkut inissisimanagera aallaavigalugu kommunit assigiiamik nalilersuilluni missiliuereernerisigut utertitsisussaataaernermik piunasaqaatitalimmik piunasaqaatitaqanngitsumilluunniit ikiorsiissutit tamakkiisumik tamakkiisuunngitsumilluunniit tunniunneqarsinnaasariaqarput.

Utoqqalinersiaqartup toqusullu qanoq imminnut attuumassuteqartiginissaannut tunngasoq ilisinermi aalajangersakkat qanoq annertutigisumik erseqqissarneqarnissaannut tunngasut ataatsimiititaliap oqaluuserai. Assersuutigalugu ilisisoqartillugu ukiumut ataasiarluni angalanermut aningaasartuutit matussuserneqartussat, qatanngutit, meerarizat, ernuttat, imaluunniit utoqqalinersiallip ernutaqqiutai pineqarsimanersut erseqqissaavigineqarsinnaapput. Ataatsimiititaliap sukumiisumik eqqartuereerluni isumaqatigiissutigaa aalajangersagaq utoqqalinersiallip qatangutaanut, meeraanut, ernuttaanut, ernutaqqiutaanut imaluunniit ernutaqqeqqiutaanut killeqartinneqarnera ataatsimiititaliami amerlanerussuteqartut Siumut Demokraatillu erseqqissaatigaat.

Siunnersuut saqqummiunneqarnermisut iluseqartoq UPA 2015/20-imi siunnersuummut qanoq naapertuutsiginersoq ataatsimiititaliamissaaq eqqartorneqarpoq, tassami aalajangiiffigisassatut siunnersuutip aappaani ima oqaasertaqarmat: *Utoqqalinersiallip aningaasaqarnikkut inissisimanagera aallaavigalugu kommunit assigiiamik nalilersuilluni missiliuereernerisigut*

utertitsisussaatitaanermik piunasaqaatitalimmik piunasaqaatitaqanngitsumilluunniit ikiorsiissutit tamakkiisumik tamakkiisuunngitsumilluunniit tunniunneqarsinnaasariaqarput.

Ilisinermi peqataajartornermut atatillugu angalanermilu aningaasartuutit matussuserneqarnissaannut piginnaatitaaffeqarneq utoqqalinersiallip isertitaanut aningaasaataanullu tunngasut qanoq nalilivigineqartassanersut ataatsimiititaliap eqqartorpa.

Isertitat killingat aalajangersakkamut ilanngunneqassasut ataatsimiititaliami amerlanerussuteqartut oqaatigissavaat, tamatuma kinguneranik utoqqalinersiallit ukiumut 250.000 kr.-t inorlugit isertitallit angalanermut aningaasartuutaat tamakkiisumik matussuserneqartassapput. Immikkut pisoqartillugu angalanermi aningaasartuutit annertusimatillugit isertitanut killigitinneqartoq taanna 300.000 kr.-iusariaqassaaq.

Allannguutisatut siunnersuutip pingajussaaneernejarnissaanut Naalakkersusit tamatumunnga naapertuuttumik allannguutissatut siunnersuuteqarnissaat qinnutigineqassaaq.

Kapitali 7 Angerlarsimaffimmi ikiorteqarneq akeqanngitsoq

Siunnersuummi § 18 tamakkiisumik ataatsimiititaliamit tapersorsorneqarpoq, matumani utoqqalinersialik najukkamini najugaqaannarnissaminut angerlarsimaffimmi ikiorteqarnissamik pisariaqartitsippat akeqanngitsumik angerlarsimaffimmini ikiorteqarnissamat pisinnaatitaaffeqarlissammat.

Angerlarsimaffimmi ikiorteqartarnerup sukumiinerusumik maleruagassiuunneqarneratigut angerlarsimaffimmi ikiorteqartarnermut peruserineqartussaq Naalakkersuisut sukumiinerusumik erseqqissaavigisariaqaraat malunnartumik pisariaqartinneqartoq isumaqartoqarpoq. Assersuutigalugu angerlarsimaffimmi ikiorteqarnermi suliassat suut soorlu eqqiaaneq, atisanik errorsineq, pisiniarneq, aputaajaaneq il.il. sularineqartassanersut erseqqissaavigineqartariaqarput. Angerlarsimaffimmi ikiortit suliassaasa amerlassusissaat pitsaassusissaallu erseqqissaavigineqarnissaat taamaalilluni pingaaruteqarluni. Kommuni angerlarsimaffinni ikiortit sulisuisa aammalu peqqinnissaqarfiup ikorfartortillu utoqqalinersialinnut suliassaat imminnut attuumassuteqannginnerat aammattaaq ersarissarneqartariaqarpoq.

Kapitali 8 Aqutsineq

Siunnersuummi § 18 pisariaqartinneqartumik ersarissuseqartoq ataatsimiititaliaq isumaqarpoq.

Kapitali 9 Paasissutissisussaatitaaneq aamma nakkutilliusussaatitaaneq

Utoqqalinersianik tapiliussaasinnaasullu ilanngullugit pisinnaatitaanermut imaluunniit nalimmassaasoqarnissaanut tunngasuni atugarisatigut allannguuteqartoqartillugu

utoqqalinersiaqartup oqartussanut paasissutissiinissaminut pisussaaitaanera ataatsimiititaliamit isumaqatigineqarpoq.

Siunnersuummik matuminnga aappassaaneerinninnissamat paasissutissiisussaaitaaneq aamma Naalakkersuisunut sammitinniarneqarnerisooq Naalakkersuisut nassuiasagaat ataatsimiititaliap kaammattuutigissavaa, tamannami siunnersuummi allassimangimmat. Pisuni aalajangersimasuni qinnuteqartoq kommunit agguataarnerisa avataanni najugaqarsimappat siunnersuummi § 19, imm. 2 naapertorlugu qinnuteqartoq Naalakkersuisunit suliarineqartillugu immaqa immikkut eqqarsaatigineqarsinnaavoq. Taamaattoqarsimasappat iluaqutaasumik siunnersuummi § 20, imm. 1-imi erseqqissaassuteqartoqarsinnaavoq.

Utoqqalinersianik tapiliussaasunillu tunniussisarnermi kommunalbestyrelsip pisussaaffiitut tunngatillugu siunnersuummik aappassaaneerinnissamat siunnersuut § 21, matumani ilanngullugu nakkutilliinissamik pisussaaffimmi tassani aningaasat eqqortut piffissarlu eqqortoq tunniunneqarnerisut qulakkeerneqarnissanut nalinginnaasumik inatsisitigulluunniit pisussaaffiup avataaniittutut isumaqarfigineqarnerisooq Naalakkersuisut itisiliivigissagaat ataatsimiititaliamit kissaatiginartinneqarpoq.

Siunnersuummi matumani pisussaaffiit aammalu tamatumunnga atatillugu aningaasaqarnikkut allaffissornikkullu kingunerisassat kommuninut ersarissaatigineqarnissat kommuninut aalajangiisuusussaavoq.

Kapitali 10 Tunniussisarneq

Utoqqalinersianik tunniussisarneq pillugu siunnersuummi § 22-imut ataatsimiititaliaq namminerisaminik oqaaseqaatissaqanngilaq.

Siunnersuummi § 23 ataatsimiititaliamit tamakkiisumik tapersorneqarpoq, tamatuma kingunerisaanik suliamut matumunnga atatillugu utoqqalinersiallip utoqqalinersiaasa aqunneqalernissaannut aalajangiisoqarsinnaassalluni, pineqartup aningaasaqarniarnini aqussinnaangippagu. Utoqqalinersiallit aningaasaqarniarnermi illersorsinnaasumik aqutsinnaangitsut aningaasaqarniarnierisa torersumik ingerlanneqarnissaasa qulakkeerneqarnissaa siunertaralugu taanna sakkutut kommuninit atorineqartarnissaa ataatsimiititaliap kaammattuutigissavaa, taamaalilluni tamat kissaatigisaattut toqqissimasumik atugaqarnissaq qulakkeerneqassalluni.

Siunnersuummi § 24 pisariaqartinneqartumik ersarissaq ataatsimiititaliaq isumaqarpoq.

Kapitali 11 Akiligassanngortitsisarneq

Siunnersuummi aalajangersagaq § 25 ataatsimiititaliap tusaatissatut tiguaa, tamatuma kingorna *Utoqqalinersiat aamma tapiliunneqarsinnaasut akiligassanut allatulluunniit pinngitsaalisaasumik akiliisitsiniarnermi pisortanut akiligassaqartoqartillugu taamaallaat attuumassuserneqarsinnaalissallutik.*

Kapitali 12 Naammagittaalliuuteqarsinnaaneq

Siunnersuummi § 26, matuma kingorna inatsit naapertorlugu aalajangiinerit Isumaginninnermi Naammagittaalliuuteqartarfimmut naammagittaalliuutigineqarsinnaanerit paasinartoq ersarissorlu ataatsimiititaliaq isumaqarpoq, matuma kingorna tamatumunnga atatillugu ersarinnerusumik ataatsimiititaliaq oqaaseqaatissaqanngilaq.

Kapitali 13 Aningaasalersuineq naatsorsuuserinerlu

Utoqqalinersialinnut, tapinut angerlarsimaffimmilu ikiortinut aningaasartuutitut tunngasoq Nunatta Karsiata kommunillu akornanni aningaasatigut agguaasarnermi najoqqutassiaq siunnersuummi § 27-imi ersarissumik allassimasoq ataatsimiititaliamit tusaatissatut tiguneqarpoq.

Siunnersuutip aappassaaneerseqarnissaanut utoqqalinersiallit ilisiartornerminnut atatillugu aningaasartuutaasa aningaasalersorneqarnissaa ersarissaataasumik Naalakkersuisut nassuiasagaat ataatsimiititaliamit qinnutigineqassaaq, tamannami siunnersuummi oqaaseqaatiniluunniit paatsuunganartumik allanneqarsimasoq takuneqarsinnaammat.

Utoqqalinersialik pillugu kisitsisitigut paasissutissat pillugit Naalakkersuisut qulakkeerunneqarnissaat siunnersuummi § 29 innersuussutigalugu ataatsimiititaliap tapersersorpaa. Aningaasanut Inatsisissamat inatsisiliornermilu pineqartumut atugassanik matumanilu politikikkut utoqqarnut suliniutinut tunngatillugu kisitsisunik tutsuiginartunik pissarsinissaq naalakkersuinikkut annertuumikpingaaruteqarpoq.

Kapitali 14 Atortussanngortitsineq

Inatsisip ulloq 1. januar 2016-imi atuutilernissaa ataatsimiititaliami amerlanerussuteqartut Siumut Demokratillu tapersersorsinnaavaat.

Siunnersuutip aningaasatigut kingunerisassai

Siunnersuutip piviusunngortinneqarnissaanut aningaasatigut kingunerisassai siunnersuummut nalinginnaasumik oqaaseqaatini allaaserineqarput. Allaaserisat taakku annertummata ataatsimoortillugit ataatsimiititaliap innersuussutigissavai.

Siunnersuutip atuutilerfiata kingorna ukioq siullemq siunnersuutigineqartoq annertunerusumik aningaasartuuteqarnermik malitseqassasoq, tamatumalu kingorna utoqqalinersiaqarnermut

aaqqissuussinnermut atatsillugu utoqqalinersiaqalersinnaanerup ukiuisa qafanneqarnerisigut sipaaruteqarnermik malitseqassasoq ataatsimiititaliamit maluginiarneqarpoq. Pingaartumik utoqqalinersiaqalernissamut ukiorititanut aningaasaqarnikkut annertuumik sunniuteqassaaq. Utoqqalinersiaqalernissamut ukiorititat qaffanneqarnissaat politikikkut kinguartinneqassappat akisussaasutut nassuiarneqartariaqartumik aningaasaqarnikkut tamanna annertuumik kinguneqassaaq.

Siunnersuummut nalinginnaasumik oqaaseqaatineersoq aaneqartoq takussutissiaq matuma ataani takuneqarsinnaasoq ataatsimiititaliamit ilanngunneqarpoq, siunnersuutigineqartup matuma aningaasaqarnikkut ataatsimut sunniutissaanik ersarissumik takutitsimmat, tamatuma saniatigut taakku malittarisassanut atuuttunut sanillersuuneqarsinnaammata:

Nalunaarsuut. 1. januar 2016-mi utoqqalinersiat aaqqissuuteqqinnerisigut kingunerisassai tamarmiusut

	2016	2017	2018	2019	2020	2025	2030	2035	2040
					-				
					mill.kr.-				
Aaqqissuussineq									
maannamut atuuttoq	380,5	388,3	393,8	400,5	409,5	468,4	537,6	588,2	583,8
Nutaamik ilusiliineq	20,4	19,8	19,0	19,2	19,6	19,8	23,0	26,1	26,8
<u>Utoqqalinersiaqalersinn.</u>						=	=		
<u>ukiut qaff.</u>	<u>0,0</u>	<u>-16,3</u>	<u>-31,5</u>	<u>-33,3</u>	<u>-36,7</u>	<u>-112,6</u>	<u>125,1</u>	<u>114,3</u>	<u>-91,7</u>
Tamakkiisumik							-		
kinguner.	20,4	3,5	-12,6	-14,0	-17,1	-92,8	102,1	-88,3	-64,9
<u>Utoqqalinersianut</u>									
<u>aningaasart.</u>	<u>400,9</u>	<u>391,7</u>	<u>381,2</u>	<u>386,5</u>	<u>392,3</u>	<u>375,5</u>	<u>435,5</u>	<u>499,9</u>	<u>519,0</u>

Namminersorlutik Oqartussat kommunillu akornanni agguaasarnermi najoqqutassianut siunnersuut manna allanngortitsinaviangitsoq, taamatuma kingunerisaanik nunatta karsiata 90 pct.-inik kommunillu 10 pct.-inik avillugit aningaassartuuteqarnissaat aalajangiisimaneqartoq ataatsimiititaliamit maluginiarneqarpoq.

Siunnersuutip innuttaasunut kingunerisassai

Siunnersuutip innuttaasunut kingunerisassai nalinnginnaasumik oqaaseqaatini nassuiarneqarput. Oqaaseqaatit taakku ataatsimut isigalugit ataatsimiititaliap innersuussutigissavai, immikkoortulli ataasiakkaat annertunerusumik pingaartinneqassallutik.

Innuttaasut utoqqalinissaminnut katersaqarnissaat pingaaruteqarmat ataatsimiititaliamit oqaatigineqassaaq. Tamanna pillugu sinaakutissat Naalakkersuisunit

sulissutigineqarnissaanut annertunerusumik eqqumaffigineqarnissaa innuttaasunullu sulisinnaasunut tamanut utoqqalinersiaqalernissamut anguniakkamut tamatumunnga aaqqissuussaasumik suliniuteqartoqarnissaanik qulakkeerisoqarnissaa ataatsimititaliamit kaammattuutigineqassaaq. Akileraartarnermut Atugarissaarnissamullu Isumalioqatigiissitap isumaliutissiissutaani pineqartumi Naalakkersuisut ataatsimut isiginnillutik isummerfigisassaannik arlalinnik kaammattuuteqartoqarsimasoq takuneqarsinnaavoq.

Naalakkersuisut saqqummiussaanni siunnersuutigineqartoq utoqqalinersialinnut aningaasaqarnikkut pitsaasorujussuarmik kinguneqarumaartoq ataatsimiititaliap maluginiarpa. Taamaalilluni *utoqqalinersialinnut aningaasaqarnikkut pitsaasumik kinguneqassasoq. Utoqqalinersialinnit 3.723-init (utoqqalinersiallit 2013-imi utoqqalinersiaqarsimasunit) taamaallaat 83-it aningaasaqarnikkut ajorseriaateqalaarsinnaasut Naalakkersuisunit naatsorsuutigineqarpoq.*

Siunnersuutip matuma inunnut ataasiakkaanut utoqqalinersialinnut– kisimiittunut aappariinnullu siunnersuut manna aningaasqarnikkut qanoq kinguneqassanersoq siunnersuutip matuma siullermeerneqarnerani aamma saqqummiunneqartoq politikikkut annertuumik eqqumaffigineqarpoq. Matuma malitsigisaanik aningaasatigullu kinguneqaatissat taakku innuttaasunut ersarinnerulersikkumallugit siunnersuummi nalinginnaasumik oqaaseqaatit uku pillugit ataatsimiititaliamit tigulaariffigineqassapput:

Utoqqalinersiallit kisimiittut

Utoqqalinersiallit kisimiittut utoqqalinersiaqarnermi avataatigut allanik isertitaqanngitsut inatsisissatut siunnersuummi sunnerneqassanngillat. Toqqammaviusumik aningaasartat 129.800 kr.-iusut (2013-imi kisitsisit) taarsiullugit toqqammaviusumik utoqqalinersiat 58.000 kr.-nit utoqqalinersiamullu tapeq 72.000 kr.-niusoq utoqqalinersiaqartup pisassavaa, tassa katillugit siornatigut pisartakkat assingi.

Utoqqalinersialik kisimiittoq	Utoqqalinersiaqarnermi aaqqissuussineq atuuttoq	Utoqqalinersiaqarnermut aaqqissuussinermut nutaamut siunnersuut
Toqqammavius. utoqq. annerpaaffia	Naagga	58.000 kr
Utoqqalinersiamut tapeq annerpaaq	Naagga	72.000 kr
Utoqqalinersiat katill. annerpaaffissaa	130.000 kr.	130.000 kr.
Saniatigut nammineq isertitaqarnermi annikilliliineq	Utoqqalinersiat tamakkiisut 56.000 kr. – 228.000 kr.	Toqqammaviusumik utoqqalinersiat 216.000 kr. – 332.000 kr. Utoqqalinersianut tapeq 56.000 kr. – 216.000 kr.


Angerlarsimaffimmi ikiorteqarnermut nammineq akiliut	Aap	Naagga
Utoqqalinersiuteqarsinnaanermut ukiut	65	2017-imi 66-inik 2021-imi 67-inik

Aaqqissuusseqqinnerup kingunerissavaa utoqqalinersiassanut katersisarnernit iluanaarutit aamma suliffeqaraanni isertitat qaffannissaat. Tamanna pissuteqarpoq utoqqalinersianut tapiliussanut annikilliliinermi procenti 45 pct.-inut appartinneqarmat, toqqammaviumillu utoqqalinersianut 50 pct.-inut, maannamut utoqqalinersiaqarnermi aaqqissuussinermi atuuttumi annikilliliinermi procentiutinneqartumi 70 pct. qaangerneqartaraluarpoq.

Utoqqalinersialimmuut kisimiittumut saniatigut isertitaqanngitsumut allannguummit sunnerneqassanngilaq. Annikillileeriaatsip nalimanerusup kingunerissava utoqqalinersiat aatsaat atorunnaarsinneqassasut saniatigut 332.000 kr.-inik (kisitsisit 2013-imeersut) tikippagit. Annikillileeriaatsip nalimanerusup kingunerissava utoqqalinersiallip inuutissarsiornermi peqataanerminit aamma nammineq utoqqalinersiassaminut katersinermini qaffasinnerusumik iluanaaruteqartarnissaa.

Takussutissaq. Utoqqalinersiaqarnermi maannamut aaqqissuussineq aaqqissuussinermut nutaamut sanilliullugu.

(Takussutissami: Utoqqalinersiat koruuninngorlugit)



(Saniatigut isertitat koruuninngorlugit: Tungujortoq = maannamut aaqqissuussineq / aappaluttoq: aaqqissuussineq nutaaq)

Soorlu takussutissami takutinneqartoq kisimiittuusut saniatigut isertitaqartut pitsaanerusumik atugassaqaalissapput. Kisimiittuusut utoqqalinissamut ileqqaaruteqarnissamik

kajuminnerulernerannik aamma siviisunerusumik sulisoqarnermiiginnarnissaannik inatsisissatut siunnersuutip nassatarissavaa.

Utoqqalinersiallit aappaqartut


Utoqqalinersiallit utoqqalinersiaqartumik aappaqartut utoqqalinersiat saniatigut isertitaqanngitsut pisartakkaminni annikinnerusumik qaffaateqassapput. Toqqammaviusumik utoqqalinersiat taamaallaat nammineq isertitanit sunniuteqassapput taamaalillunilu aapparisap isertitaanit attuumassuteqassanatik.

Utoqqalinersialik utoqqalinersialimmik aappaqartoq	Maannamut utoqqalinersiaqarnermi aaqqissuussineq	Utoqqalinersiaqarnermi aaqqissuussineq nutaaq
Toqqamm. utoqqalinersiat qaffasinnerpaaffiat	Naagga	58.000 kr
Utoqqalinersianut tapeq qaffasinnerpaaq	Naagga	40.000 kr
Utoqqalinersiat qaffasinnerpaaffissaa	90.000 kr	98.000 kr.
Nammineq saniatigut isertitanit annikilliliineq	Utoqqalinersiat tamakkerlugit 84.000 – 318.000 kr.	Toqqammaviusumik utoqqalinersiat 216.000 kr. – 332.000 kr. Utoqqalinersianut tapeq 83.000 kr. – 216.000 kr.
Angerlarsimaffimmi ikiorteqarnermut nammineq akiliineq	Aap	Naagga
Utoqqalinersiaqarsinnaanermi ukiorititat	65	2017-imi 66-it 2021-imi 67-it

Utoqqalinersiaqartut aappariittut kisimiillutik utoqqalinersiaqartutuulli utoqqalinersiassanut katersinerminni suliffeqarunillu isertitaminnit annertunerusumik iluanaaruteqartassapput, utoqqalinersianut tapiliutinut annikilliliinermi procenti 30 pct.-inut appassammat, siornatigut 53 pct.-iusimagaluartoq.

Takussutissaq. Utoqqalinersiaqartut aappariittut maannamut aaqqissuussineq, aaqqissuussinermut nutaamut sanilliullugu

(Takussutissami: Utoqqalinersiat koruuninngorlugit)



(Saniatigut isertitat koruuninngorlugit: Tungujortoq = maannamut aaqgissuussineq / aappaluttoq: aaqgissuussineq nutaaq)


Utoqqalinersialik siusinaartumik pensionisialimmik aappaqartumut utoqqalinersialinnut aappariittunut kingunerisassat assigeeqqissaangajattuussapput.

Allat, ilaatigut utoqqalinersiallit arlaatigut allanik pisartagassanik pisinnaatitaanngitsumik aappaqartut

Inuit allat, ilaatigut utoqqalinersiallit aappaqartut, maannamut malittarisassanut atuuttunut assingusumik atugassaqartinneqassapput. Tamanna pissuteqarpoq utoqqalinersiallit utoqqalinersianut tapinut utoqqalinersiaqartunut kisimiittunut annertussuseqartumik pisinnaatitaassammata, utoqqalinersiallip isertitai aamma aapparisap isertitai katillugit 200.000 kr.-nit ataanneqarsimappata. Taamaalilluni inuit allat utoqqalinersiaqartunut naligiinnerusumik inissisimaffeqassalissapput.

Takussutissaq. Allat

(Takussutissami: Utoqqalinersiat koruuninngorlugit)



(Tungujortoq = maannamut aaqqissuussineq / aappaluttoq: aaqqissuussineq nutaaq)

Taamaattoq aappariit namminneq isertitaqanngitsut aapparisaq isertitai apeqqutaatinnagit kisimiittunut utoqqalinersiassanut qaffasinnerpaasut 50 pct.-iinut pisinnaatitaanermut malittarisassaq atorunnaassaaq. Taamaalilluni arlaqartut annikinnerusumik isertitamikkut annaasaqassapput, taamaattorli utoqqalinersialinnut qaffasissumik saniatigut isertitaqartunut tamanna annertunerusumik atuutissaaq, tassa aningaasaqarnikkut sanngiinnerpaatut inissisimasut pinnagit. Malitsigisaanik utoqqalinersialinnut allanut naligiisinneqalissapput.

Ataatsimiititaliap eqikkaalluni ilassuteqarlunilu oqaaseqaataa

Kalaallit Nunaanni utoqqalinersiat isumaginninnikkut utoqqalinersiatut isigisariaqarput, utoqqaat anigaasatigut pitsaanngitsumik inissisimasut inuuniarnikkut atugaasa pitsaanerulernissaannik qularnaarisussat. Taamaalillutik utoqqalinersiat atugarissaarnissamut aaqqissuussaansinnut ilaapput.

Utoqqalinersiat pillugit malittarisassat sulisinnaasunut sulerusuttunullu akornutaanngimmata periarfissatullu isigineqarmata erseqqissaassutigineqassaaq. Matumani siunnersuummut matumunnga atuuppoq, matumani utoqqalinersiat annertunerusumik appaaviginngikkaluarlugit utoqqarnut suliffeqarfinnut attuumassuteqaannarnissamik kissaateqartunut pilerinarnerulernissaa pillugu politikkikkut kissaatigisanut amerlasuunut naammassinnimmat.

Inuiaqatigiinni utoqqaat amerliartuinnarput ineriartornerlu tamanna ingerlaannarluni, inuit amerlassusaat siunissamut takorluuilluni naatsorsorutsigit taamalu innuttaasut katitigaanerisa ineriartornerat eqqarsaatigutsigit. Ataatsimut isigalugu sivilisunerusumik inuusalerneqarput namminermi pitsaasuvoq, ajornartorsiulli tassaavoq pilersuisussat amerliartunnginneri

imaluunniit pissuseqataanik amerliartunnginneri. Ajornartorsiut Akileraartarnermut Atugarissaarnissamullu Isumalioqatigiissitap isumaliutissiissutaani 2011-imeersumi nassuiarluarneqarsimavoq, ilaatigut ullumikkut utoqqalinersialittavut 65-inik ukiullit utoqqaanerusullu 3.700-sut kisitsillu taanna 2014-imi 9.200-ngortussaalluni. Tamatumunnga atatillugu 18-iniit 64-inut ukiullit amerlassusaasa aalaakkaaginnartut sanilliuqqarluni.

Siunnersuummi matumani utoqqalinersiat iluarsineqarnissaannut aningaasaqarnikkut nammaneqarsinnaanera pillugu apeqqut qitiulluinnarpoq ataatsimut isigalugu aningaasaqarnerup ineriartorneranut tunngatillugu ataatsimiititaliamit nalileruminaassinnaasoq. Siunnersuutip aningaasatigut kingunerisassai ataatsimut isigalugu Naalakkersuisut allaaserilluarsimavaat, aningaasaqarnikkulli nammaneqarsinnaaneranut tunngatillugu ataatsimut isigisumik aningaasaqarnerup ineriartorneranut atatillugu naliliisoqartariaqarluni. Naalakkersuisut Inatsisartullu ataatsimiititaliamit tatigineqartariaqarput aammalu inuiaqatigiit kalaallit ineriartornerat tamakkiisumik nalilerneqarnera aallaavigalugu minnerunngitsumillu aningaasaqarnikkut ineriartorneq eqqarsaatigalugu aningaasaqarnikkut nammaneqarsinnaasutut isumaqarfialugu.

Ungasinnerusoq isigalugu paasinarsippat siunnersuut aningaasaqarnikkut nammaneqarsinnaanngitsoq pineqartumi allannguuteqartitsinissaq naatsorsuutigineqassaaq, taamaalilluni utoqqartatta atugarissaarnissaannut aqqissuussinerput aningaasaqarnerup ineriartorneranut pisinnaasaanullu naleqqussartariaqassalluni.

Innuttaasut sulisinnaasut namminneq sipaartarnissaat allatigullu suliffeqarnermi soraarnerussutisianik katersaqarnissaq pingaaruteqartoq Naalakkersuisut erseqqissaatigigaat ataatsimiititaliamit maluginiarneqarpoq.

Katersaqarnissamut soraarnerussutisiaqarnermilu suliniutit ataatsimiititaliamit tamakkiisumik tapersorsorneqarput, taakkulu piviusunngortinneqarnissaannut Naalakkersuisut sulinertik ingerlatiinnassagaat kaammattuutigineqarluni. Namminersorlutik inuussutissarsiortorpassuit soorlu aalisartut, piniartut nunalerisullu allat assigalugit utoqqalinissaminnut katersaqartalnissaannut piuumassuseqalersinnissaannut sinaakkusiinissamillu Naalakkersuisut aammattaaq sulissuteqassasut ataatsimiititaliamit erseqqissaatigineqassaaq. Matumunnga ilassutigalugu siunnersuut atorfillit soraarnerussutisiaannut pillugit malittarisassaannut ataqatigiinerat Naalakkersuisut eqqumaffigissagaat ataatsimiititaliamit aammattaaq innersuussutigineqassaaq.

Inini attartortittakani ineqarnermut tapiissutit pillugit siunnersuummik nutaamik Inatsisartut ataatsimiinneranni matumani aamma ataatsimiititaliaq suliaqarpoq. Siunnersuut manna isumaginninnermut malittarisassanut allanut, matumani ilanngullugu minnerunngitsumik ineqarnermut tapiissutit pillugit siunnersuummut ataqatigiissinneqarnissaata

annertunerusumik eqqumaffigineqarnissaa ataatsimiititaliap Naalakkersuisunut eqqumaffigeqqussavaa, taamaalilluni siunnersuutit taakku ataqatigiissinnaaniassammata isumaginninnikkullu oqimaaqatigiissinnaaniassammata.

Siunnersuut ataatsimut isigalugu ataatsimiititaliami politikkikkut isumaqatigiittoqaraluarpulluunniit ataatsimiititaliap ataatsimoortup siunnersuutit piviusunnigortinneqarnissaa sunniutaalu qanimut malinnaavigineqarnissaat ataatsimiititaliamit ataatsimoorfigineqarpoq. Siunnersuutit naatsorsuutigineqartut aningaasaqarnikkut allaffissornikkullu kingunerisassai siunertarineqartuq naapertorlugu immikkoortinneqartut nassatarisassaalu qanoq sunniuteqassanersoq, pissusissamisut ingerlanersoq naammannersorlu politikkikkut nalilersorneqassaaq.

Nalunaarusiamik ataatsimoortumik imaluunniit pissutsit pillugit naliliinermik ataatsimiititaliamit oqaatigineqartunik ataatsimiititaliap kingusinnerpaamik 1. januar 2018-imi tigusaqarnissani qinnutigissavaa.

Inatsimmut tungatillugu ajornartorsiutinik ataqatigiissunik arlalinnik naapertuutinnigitsunilluunniit Naalakkersuisut kommunillu tamanna sioqqullugu misilittagaqarfilerpassuk peqqutissaqanngitsumik nangaanertaqanngitsumik malittarineqarnissaa ataatsimiititaliamit qinnutigineqassaaq.

Naalakkersuisut allannguutissat siunnersuutaat

Ulloq 29. oktober 2015 siunnersuummik aappassaaneerinissamat allannguutissat siunnersuumik Naalakkersuisut nassiusaqarput.

Allannguutissat siunnersuuteqarnermi allannguutissat siunnersuutit aningaasatigut allaffissornikkullu kingunerisassat pillugit nassuiaammik malitseqartitsisoqanngimmat oqaatigineqassaaq. Siunnersuumut allannguutissat siunnersuut pillugu ulloq 3. november 2015-imi ataatsimiititaliaq nassuiaavigineqarpoq.

Allannguutissat siunnersuut pillugu ataatsimiititaliamit oqaatigineqassaaq, allannguutissat siunnersuut ataatsimiititaliami amerlanerussuteqartut Siumumit Demokraatinillu tapersorsineqarsinnaasoq.

Ataatsimiititaliap inassuteqaatai

Siunnersuut siunertarisaalu tamakkiisumik tapersorsornartuusut ataatsimiititaliami amerlanerussuteqartut Siumut Demokraatillu isumaqarput.

Tamanna aammalu oqaaseqaatit isumaliutillu saqqummiunneqartut tunngavigalugit amerlanerussuteqartut taakku Naalakkersuisut allannguutissat siunnersuutaat

akuerineqassasoq tamatumalu kingorna iluserilikkamisut iluseqarluni siunnersuut akuerineqassasoq innassutigaaat.

Ataatsimiititaliami ikinnerussuteqartut Inuit Ataqtigiit oqaatigissavaat:

Naalackersuinikkut nunatta aningaasarsiornikkut aaqqissuuteqqinniarnera Inuit Ataqtigiit isumaqtigaarput. Aaqqissuuseqqinneq una pineqartoq pipallatamik suliaavoq naammattumillu innuttaasunik peqataatitsinani naalackersuisooqtigiinniit ingerlanneqarluni. Aningaasanik sipaarniarfusinnaasut, akitsuuserneqarsinnaasullu nunatsinni amerlaqisut akornanni Utoqqalinersiat siullertut sipaarniarfigineqarnerat Inuit Ataqtigiit isumaqtiginngilaat.

Inuiaqtigiinni aningaasarsiorluartut siullertut aallerfiginagit aamma inuit atugarissaartut tapiiffigineqartarnerat millisarnagu, minnerunngitsumillu inuit pisariaqtitsinerpaat aaqqissuuseqqinnermut pilliuteqartitaanerat Inuit Ataqtigiit ilalersorsinnaanngilaat.

Utoqqalinersiaqalernissamut ukiorititat qaffanniarneqarnerat inuiaqtigiinni atugarissaarnitta ajorseriartinneqarnerattut isigisariaqarpoq. Minnerunngitsumik utoqqalinersiaqalernissamut ukiorititat inuit nunatsinni inuuneqqortussusaannut naapertuutivinngitsumik inisseratarsinnaavoq. Taamaattumillu utoqqalinersiaqalernissamut ukiorititat qaffanneqarnissaat kinguartinneqassaq, taamaalillunilu 2019-imi 66-inut qaffatsinneqassasoq aammalu aatsaat 2023-imi 67-inut qaffatsinneqassasoq Inuit Ataqtigiit siunnersuutigaaat. Isumaqarpugut inuiaqtigiit periarfissinneqanngitsut apeqquterpassuit utoqqalinersiaqarnermik aaqqissuusseqqinnermut tunngasut isummerfiginissaannut. Tamanna imaaliallaannaq akuerineqarsinnaanngilaq.

Utoqqalinersiaqartut kisimiittut qaffaavigineqanngillat, naak akit qaffakkiartornerannut aningaasallu naleerukkiartornerannut inuit kisimiittut isertitaat eqqorneqarnerpaajusartut uppernarsaatissaqartoq. Utoqqaallu aappaqartut pilersueqtigiittussaatitaanerisa inatsisitigut atorunnaarsinneqarnerata malitsigisaanik utoqqalinersialinnut tapiissutit peerneqartussat utoqqalinersiat qaffariaataannut ”noqitsisuussapput”. Taamaalilluni utoqqalinersiaqartut ataatsimut isigalugit aningaasat pisartagaat ataatsimut isigalugit qaffariaatissaat annertoorujussuurtut oqaatigineqarsinnaanatik.

Inuit Ataqtigiit ikinnerussuteqarluta oqaaseqaat aqputigalugu naqissuserparput aaqqissuusseqqinnerit naligiinnerulernissamik kinguneqartussat aallartisarneqanngitsut inuit pisariaqtitsinerpaat naalackersuinikkut piiiaffigineqarnerat isumaqtiginngilarput. Matumani pivagut akileraarternikkut, ineqarnikkut isumaginninnikkullu aaqqissuusseqqinnerit. Aningaasarsiornikkut nukissaqarnerpaat peqataatinnaveersaarlugit aaqqissuusseqqinnerit isumaqtiginngilarput. Naalackersuisooqtigiit aaqqissuusseqqinnerat inuit nammaqtigiinnerulernissaannut ungasillisaataavoq.

Inuit inuiattut ataatsimut nunaminni aaqqissuuseqqinnissaat, suleqatigiinnissaat aammalu paaseqatigiilluni aningaasarsiornikkut aaqqissuuseqqinnissaat matumani pinngitsoortinneqarmat Inuit Ataqtigiit akerliliivugut. Nunatta aningaasaqarnikkut aaqqissuussivigineqarneranik taallugu utoqqaat sipaarniarfigineqarnerat Inuit Ataqtigiit isumaqatiginagu aaqqissuuseqqinnissap annerulersinneqarnerattut isigaarput.

Tamanna tunngavigalugu oqaatigineqartunillu nangaanartoqartitsillutik siunnersuut akuerineqartussanngorlugu ikinnerussuteqartut taakku inassutigisinnaanngilaat.

Taama oqaaseqarluni isumaliutissiisummilu oqaatigineqartunik paasinnilluni siunnersuut ataatsimiititaliap aappasaaniigassanngortippaa.

Tillie Martinussen,
Siulittaasoq

Agathe Fontain

Jess Svane

Ineqi Kielsen

Laura Tàunâjik

Ane Hansen

Mimi Karlsen